

胡文忠公遺集

胡文忠公遺集卷四十一



長沙鄭敦謹

編輯

澠鄉曾國荃

覆陳湖北兵力不敷暫難籌撥情形疏 十一年

三月初三日

咸豐十一年二月初四日承準軍機大臣字寄咸豐十一年正月二十三日奉 上諭翁同書奏請飭

撥楚兵協同防剿等語據稱苗沛霖因與壽州團練尋仇時思殺官報復聲言欲攻壽城并有勾結廬州粵逆之語現在該前撫練兵守陬紮營河口尙無疏

懈惟兵力尙單請飭湖北巡撫撥精兵二千駐紮三河尖協同防剿等情苗沛霖恃強跋扈意存叵測已諭令袁甲三妥籌辦理前有旨令翁同書來京另候簡用授李續宜爲安徽巡撫現在壽州兵力尙單著官文胡林翼就近調撥精兵二千名派委得力將弁統帶駐紮三河尖以壯皖軍聲援而固楚疆門戶至胡林翼前保之同知劉蓉現在何處聞該員才具尙好應如何錄用之處著胡林翼酌量具奏將此由六百里諭令知之欽此竊查湖北以全力謀皖本省畱防之兵卽形單薄自霍山失利賊逆乘虛而上黃州

既陷武漢震動省會之地僅存馬隊百數十名營兵亦止二千數百臣官文倉卒添募新勇分撥布置加以水師礮船梭巡江面扼賊南渡賊之詭謀原欲擾我腹地使我軍不得不分乃狡焉肆出以圖解安慶之圍故其深入也風馳雨驟晝夜兼行不數日而黃州之賊已竄至黃安黃陂一帶意在牽掣李續宜使之愈追愈遠而其潛伏桐城之賊不下十萬伺釁乘瑕眈眈欲動假令挂車河之軍再爲分撥多隆阿必難自立而前路一空勢將無所顧忌長驅競進直撲安慶矣若遽撤安慶之圍則潛山宿松等處六州縣

仍歸淪沒不獨前功盡棄爲可惜而皖北永無廓清
之望卽鄂省更增滋蔓之虞曾國荃一軍孤立驟無
援師臣等且爲慮之太湖地勢下可通安慶桐城之
氣上可過黃州回竄之鋒應有重兵駐紮方能扼要
出奇四路策應臣胡林翼以二千人力疾守城亦正
苦於無勇可募無餉可增臣等於鄰省軍務但使力
有可籌斷不稍存推諉惟值此事勢萬緊若欲勉強
抽撥竊恐兵力愈分兵心愈危轉致貽誤全局臣等
之罪滋大一俟李續宜剿辦得手軍威漸伸則城賊
之膽必寒克復之期可卜自應通籌皖北戰守以稍

紆

皇上南顧之憂至同知銜候選知縣劉蓉現

隨湖南撫臣

駱秉章入蜀臣

胡林翼另片詳悉具奏

所有兵力勦辦不敷暫難籌撥情形理合恭摺由驛
六百里覆陳

再臣奉

恩旨垂問劉蓉如何錄用之處當卽欽

遵轉詢湖南撫臣

駱秉章嗣據駱秉章函稱劉蓉新

募護軍營勇丁八百名總辦營務隨同入蜀并經附

片

奏明在案臣

查劉蓉器識遠大兼知兵事如蒙

天恩逾格簡用畀以封疆藩臬之任尙能獨當

一面不負職守謹附片覆陳

官軍克復孝感等縣並解麻城縣圍疏三月十

六日督發

竊皖逆自踞黃州後分黨數萬裹脅日眾竄擾麻城黃安黃陂孝感雲夢德安隨州等屬勢極披猖臣官文先將武漢根本重地籌防穩固一面商議各軍分道剿辦並二月二十三、四等日副都統舒保等馬步各隊於灡口雙廟等處截擊竄賊迭獲勝仗情形已會摺馳奏在案嗣臣李續宜統率所部會合舒保馬隊先後由灡口進紮雙廟楊店一帶審察地勢賊情知悍逆聚踞孝感縣城而以德安雲夢隨州三處

踞賊爲長蛇之勢意圖窺伺荆襄適統領水師惠潮
嘉道彭玉麟督各營礮船上駛至省臣官文面授機
宜卽行督隊泝流而上與臣李續宜商定進兵之策
力攻孝感以扼其吭三月初一日派道員金國琛等
率湘營勇丁七千餘人由楊店進紮孝感離城五里
許之東北各路又彭玉麟率嚮導營花翎都司王吉
等帶舢板數十號入府河至該縣城河進攻舒保督
帶馬隊往來策應初二日各軍齊至孝感城邊見城
上旂幟如林城外環築土壘木卡密釘濠籤城河纜
木爲橋四面鎗礮密布以拒我師初三日王吉率礮

船至城河賊出大隊抗拒我師開放鎗礮立斃紅衣黃帽賊目一名眾賊披靡敗退各哨官直前奮擊燒賊船數十號斃賊二三百人生擒長髮老賊二十一人初四五等日大雨停兵初六日卯刻王吉率守備陳邦榮等駛至西門拋擲火蛋焚燬賊卡城賊出拒我軍舳舻且戰且進立將浮橋焚燬斃賊多名而陸師連日攻擊輒爲堅壘所阻初七日陸師均進逼東西北城根一帶彭玉麟等會商以水師分爲三隊晝夜轟擊東南兩門金國琛等以陸隊四面圍攻城壘自初八夜水陸夾擊施放鎗礮火器城賊壘賊死拒

不懈加以濠溝木城層層阻隔力攻一日夜傷亡弁
勇甚眾而各軍志氣彌厲不肯收隊誓破此城而後
已至初九日二更始將木城焚拔濠溝填滿四面攻
進立將東西兩大壘踏平斬擒悍逆數十名賊眾慌
亂敗軍陸師乘勝由大東北等門緣城而入水師由
小東門緣城而入敗賊急縱火突城逃竄當於是日
亥刻將縣城克復派兵防守水師沿岸轟追二十餘
里舒保金國琛等卽率馬步隊跟蹤追剿斃賊甚多
天明追至白沙渡逆眾情急爭渡落河淹斃者屍積
滿河馬步力戰兩晝夜已覺困乏馬隊又追殺數十

里賸殘賊百餘名逃往德安城中我軍振旅回營綜計此次攻城追賊殲斃四千餘名生擒五百餘名內有僞丞相僞殿帥僞指揮僞檢點等數十名均卽正法奪獲騾馬五十餘匹鎗礮刀矛旂械無算僞照多張解散被擄難民數千名此三月初九日亥刻水陸各軍大獲勝仗克復孝感縣城之實在情形也臣官文前於雲夢應城被賊竄擾卽經派調副將銜游擊王允昌都司江得勝步隊副將銜洞庭營游擊張啟基水師馳往襄河潰口一帶勦辦竄逆兼爲孝感各軍聲援嗣雲夢縣知縣吉棟稟報督帶團丁會同水

陸兵勇於三月初七日將縣城先自迅速收復搜捕境內逃逆罕獲長髮賊十二名解省正法署應城縣知縣艾錕稟報逆匪闖入縣城該令招集膏洞勁勇擊退賊未踞擾又黃陂黃安二縣疊經該縣整齊團練擒斬逆賊多名縣城當卽收復仍飭各該縣嚴守山僻要隘遏賊竄路又麻城縣城前經知府梁作楫一軍會同該縣知縣吳林嬰城固守三月初四日賊眾萬餘由英霍繞路直撲縣城凱左營副將銜參將劉中和奮勇出隊斃馬賊數十名猝遇步賊圍裹力竭陣亡兵勇亦傷亡數百嗣梁作楫等調集守關兵

勇內外夾攻殺賊三百餘名敗賊潰竄城圍已解等情由該縣吳林等稟報前來查逆眾上犯楚疆懾於武漢兵威之盛無由逞志分股繞竄德安孝感等屬圖窺荆襄又以另股逆眾直犯麻城牽我兵力計甚狡毒此次水陸各軍奮力痛剿斬馘數千之眾克復孝感縣城雲夢應城等屬逆匪枝葉已翦麻城之圍亦解實足以寒逆膽而快人心刻下德安隨州賊勢漸孤臣李續宜會同舒保當率得勝之師分道圍攻期速埽清上游境地直搗黃郡逆巢臣官文又添募湘軍仍嚴防武漢鎮靜調度臣胡林翼督飭前敵各

軍力圖桐懷慎密防勦總期迅掃逆氛仰慰宸

厯克復孝感案內水師嚮導營花翎都司王吉血戰

數日奮勇冠軍可否賞加勇號候選道員金國

琛督隊嚴明曉暢軍事可否賞加按察使銜出

自天恩此外出力文武員弁人等容臣等查明

擇尤酌保籲懇鴻慈麻城勦賊力戰陣亡之副

將銜參將劉中和仰祈恩準飭部從優議卹以

慰忠魂除飭查各軍陣亡員弁另行辦理外所有水

陸各軍勦辦皖逆連獲勝仗克復孝感等屬情形謹

會同繕摺由驛馳奏

楚軍截勦安慶援賊獲勝疏 四月初七日督發

竊皖逆上竄楚晉前經臣官文等將分軍勦辦迭獲
勝仗並克復孝感情形先後會摺 奏報在案臣等
料該逆必有分股回援安慶之計當飭懷桐水陸各
軍嚴密戒備三月十三日探報僞英王陳玉成卽四
眼狗於德安隨州各畱強賊萬餘以死拒守牽制我
軍該逆仍糾集悍黨由蘄州黃廣回竄宿松境內窺
伺 臣胡林翼太湖大營後路見我軍加勁守禦賊不
敢犯繞竄宿松縣屬之桃花鋪福州副都統多隆阿
卽派記名副都統溫德勒克西金順各率所部馬隊

官兵七百餘員名馳往迎擊十四日黎明我軍正在
紮營見該逆漫山而至溫德勒克西等乘其喘息未
定奮起擊之鏖戰四時之久斬馘多名狗逆不敢久
停卽率眾逕竄石牌而入安慶於集賢關外築壘抗
拒多隆阿以賊眾我寡必須添調步隊出奇制勝親
自督師前往當派記名總兵雷正綽儘先副將楊朝
林儘先參將穆正春儘先副將王可升等率精選中
前左右四營又派儘先副將趙旣發率勝勇營儘先
副將曹克忠率忠字營儘先參將王萬年率年字營
參將余福象率親兵營均各出七成隊馳往迎剿並

派吉林黑龍江各起馬隊爲懷桐兩路策應二十一日拔營進紮高路鋪二十二日午刻探報有桐城廬江逆首僞璋王林紹璋僞玓王洪成玓僞前軍吳如孝等率大股二萬餘自新安渡至橫山鋪到練潭一帶連營三十餘里將由馬踏石過河竄往安慶與狗逆聯合圖解城圍多隆阿審察賊情緩急定計截剿援賊斷其內外勾結之勢遂於二十三日午後令雷正綰楊朝林王可升朱希廣等各率所部弁勇由下路出擊練潭令穆正春趙旣發曹克忠楊正彪等各率所部弁勇由中路出擊橫山鋪令余福象王萬年

姜玉順各率所部弁勇由上路抄擊後山埋伏之賊
又令溫德勒克西金順雙福富平阿等各率馬隊由
左路金神墩襲賊之後爲牽制之師布置既定分途
而進該逆張旂出抗我軍步隊奮呼齊進鎗礮環施
刀矛并舉殪其悍賊數十人逆眾披靡潰竄適余福
象王萬年由橫山後抄至將賊裹在垓心馬步前後
夾擊殺聲震天屍橫遍地逃賊爲追軍所迫紛紛投
入菜子湖淹斃無數維時新安渡又出援賊萬餘揚
旂疾至多隆阿登高瞭望傳令以三營步隊擊其首
以五營步隊擊其腰而以馬隊繞擊其尾該逆前後

失措登時潰敗我軍圍殺殆盡敗賊奔回桐城馬隊
追過天林莊而返沿途斬殺甚夥收隊回營時已二
更查點我軍無一傷亡是役也計殺斃黃衣賊目五
名轟斃及溺水死者共一萬餘人生擒三十一名奪
獲騾馬四十餘匹偽印鎗礮不計其數此三月二十
三日我軍勦辦安慶援賊大獲勝仗之實在情形也
二十四五日多隆阿正擬圍勦安慶而探報逆首黃
文金與敗逆林紹璋等又由蕪湖調到新賊七八千
人并捻匪二萬餘均至天林莊築壘二十餘座欲洩
前忿竄入安慶以通狗黨二十七日卯刻多隆阿密

飭馬步隊掩旂息鼓分伏山隘而以馬隊數十人且進且退者數次示以怯弱該逆果率大隊猛撲行五六里我軍伏兵齊起金順等馬隊又分兩路左右包抄鎗斃箭斃之賊又二千餘名敗逆竄回天林莊原壘因值大雨我軍卽行收隊現仍設計進剿等情由多隆阿馳報前來臣等查此次狗逆糾黨回竄圖解安慶城圍詭謀已非一日臣等先經咨飭駐紮安慶圍師之道員曾國荃等固守濠壘以防爲勦提臣楊載福亦率水師總兵李成謀等梭巡外江內湖焚奪賊舟數十號以杜城賊往來接濟乃該逆恃有外援

之眾冀內外聯爲一氣逞其鳴張仰賴

聖主威

福遐臨曾國荃臨大敵而能鎮靜固守營壘壯志可
嘉多隆阿料敵決勝督率將士出其不意連日截剿
大獲勝仗殲斃援賊萬餘人實足以申

天討而

快人心

臣胡林翼現復添調介字等營並調回副將

成大吉一軍多隆阿復抽調義中等十三營卽當剋
期會合痛剿查狗逆已入樊籠應卽先行毀平集賢
關等處賊壘進兵速克堅城仰慰

宸厪此次剿

辦尤爲出力之副將銜儘先參將勤勇巴圖魯穆正
春副將銜儘先參將揚勇巴圖魯姜玉順儘先參將

楊正彪等三員均請免補參將以副將儘先卽補已
革參將因功續保參將銜朱希廣請 賞加副將
銜吉林二起副都統銜儘先協領鑲白旗佐領委營
總富平阿前因隨剿不力經荊州將軍都興阿奏參
摘去頂戴交部議處此次奮勉立功請 實還頂
戴開復原參處分出自 天恩其餘在事出力人
員容臣等查明擇尤彙保合併陳明所有連日剿辦
安慶大股援賊大獲全勝情形會摺由驛五百里馳
奏

再皖逆前由英霍入楚臆疾異常自竄踞黃州疾趨

德安孝感隨州等屬因楚師全駐皖疆鄂省存城旂
綠各營兵勇不滿三千勦守均難足恃當聞警之初
臣官文矢志固守以待援兵外雖示以鎮靜而內則
憂心如焚仍照前在將軍任內守荊州之法周密布
置又兼文武大小官員齊心努力武漢扼要巡防使
賊不知虛實未敢遽行上犯又上下江面水師礮船
晝夜梭巡賊亦無由偷渡省地得臻穩固嗣臣李續
宜與舒保統率所部於二月二十日均繞至省垣與
臣官文面商機宜以賊勢趨聚孝感德安隨州等屬
蓄意窺伺荊襄正值捻逆出巢由南陽竄入楚境上

游老河口逼近襄陽而荆襄爲中原重鎮一有疏失
不特疆場之寇遽爲響應且慮秦晉上游聞風震動
北路大局所關較黃州尤爲喫重是以臣等權其緩
急臣李續宜以大隊直搗孝感卽於收復縣城後進
攻德安隨州仍令成大吉等軍勦辦黃州現成大吉
調援安慶彭玉麟督率水師於外江內湖節節布置
上下嚴密梭巡以防江面臣官文又以李續燾唐敏
興余際昌各軍赴黃州武昌一帶攻勦賊由蘄州暗
通興國前免罪各匪勢將蠶動復派候補知府唐協
和候補都司江得勝馬隊營總花凌阿等率馬步一

千三百名前往大江南岸之興國大冶等處查拏土匪兼助北岸黃州各軍聲勢此分別籌辦之情形也
駱秉章拔蜀一軍前經臣等奏請暫畱助鄂援江
嗣駱秉章分畱道員劉嶽昭所部勇丁四千六百人
於三月初旬由宜昌拔營行抵安陸當經臣官文飛
飭劉嶽昭率勇馳往隨州得以專力攻剿兼保安襄
門戶現據報於二十六日已抵隨州相地紮營其各
邑團練派員前往整理尙皆踴躍臣李續宜以瀟口
爲老營已令道員金國琛等率各營勇丁會合舒保
馬隊進駐德郡之東北逼城而壘惟該逆於德安隨

州各城外環築木椿數道周以深濠我軍節次仰攻未易得手三月二十六日午後德安城賊由北門出二千餘人撲我營盤經馬步奮力擊退是夜二更後復有大股逆眾分路圍撲舒保金國琛等率馬步迎剿陣斬紅衣長髮賊目四名鎗斃礮斃悍賊五百餘名奪獲旂幟偽印無算賊仍敗退入城我軍爲濠所阻未敢深入亦卽收隊查明受傷弁勇分別辦理連日爲雨所阻現復由省續解礮位築臺轟擊力圖克復等情由舒保馳報前來除仍咨飭各軍慎密防剿期速克復各城迅掃逆氛另行馳奏外再查前次

攻克孝感及攻勦德郡尤爲出力之吉林正紅旗防禦委營總安圖吉林滿洲廂紅旗領催補用防禦委營總桂廉二員籲懇 天恩賞加勇號以示鼓勵
出自 鴻慈所有德安官兵打仗獲勝並劉嶽昭一軍已飭赴隨州攻勦情形謹附片陳明

上諭官文等奏請將攻勦出力之防禦賞加勇號等語吉林正紅旗防禦委營總安圖滿洲廂紅旗領催補用防禦委營總桂廉前次克復孝感及攻勦德安逆賊甚爲出力自應量予獎勵安圖著賞給圖蘇克特伊巴圖魯名號桂廉著賞給伊拉古勒巴圖魯名號以示鼓勵欽

此四月十七日奉

奏陳楚軍剿退安慶援賊疏 五月初六日督發

竊逆首四眼狗陳玉成糾集髮捻數萬上竄德安隨
州分踞黃州蘄州黃梅宿松各城邑該逆仍自率悍
黨萬餘人回援安慶三月二十三日逆首林紹璋洪
成玕吳如孝等率黨二萬餘人由桐廬上趨欲合陳
逆被副都統多隆阿截擊大獲全勝賊仍奔回桐城
及二十七日續剿逆首黃文金獲勝大概情形業已
會摺 奏報在案茲準多隆阿咨稱三月二十六日
據探報逆首偽定南主將黃文金卽黃老虎率黨由

南岸渡江合敗逆並擒匪二萬餘人於天林莊築壘
二十餘座本日在挂車河出隊又分布香鋪街等處
多隆阿揣知該逆必復竄練潭馬踏石一帶遣搭浮
橋希圖竄往安慶與狗逆合遂於二十七日五鼓由
高河鋪親率開化新前新右義中飛虎右等五營拔
營由新安渡進兵迎頭攔擊詎逆眾亦由新安渡迎
頭蜂擁而來多隆阿當令參將銜儘先游擊藍斯明
參將銜朱希廣副將銜儘先參將姜玉順副將銜儘
先參將梁洪勝副將銜趙克彰分五營爲三隊布爲
長蛇陣勢以遏賊眾該逆搖旂猛撲二次各營施放

鎬礮賊多受傷不敢復進多隆阿登山瞭望該逆雖
分股撲挂車河老營大隊趨重新安渡實逾敵軍五
營數倍之多當卽飛調挂車河之記名副都統金順
率所部吉林六起黑龍江八起馬隊又飛調駐高河
鋪之步隊八營均於未時始到多隆阿卽派記名總
兵雷正綰儘先副將楊朝林儘先副將王可升副將
銜儘先參將王萬年率各營由右路繞出派副將銜
儘先參將穆正春儘先副將趙旣發儘先副將曹克
忠副將銜不入班次參將奈福象率各營由左路繞
出派金順率營總舒亮之吉林六起營總巴彥杜楞

之黑龍江入起更出步隊左路之左繞至香鋪街襲賊之後該逆正抵死拒戰見我軍繼集以爲伏兵果起力不能敵方欲回奔適金順率兩起馬隊從香鋪街截出馬步併擊鎗箭齊施刀矛亂刺賊紛紛敗潰由右邊奪路而逃奔往天林莊貧壘不出日暮大雨收隊回營計是役殺斃賊二千餘名生擒長髮老賊十四名奪獲馬九匹擡鎗小鎗旂幟無算同日又據營務處儘先協領穆圖善稟稱該逆以五六千人攻撲挂車河老營協領卽派總兵銜補用副將石清吉副將銜儘先參將劉寶國參將銜儘先游擊譚仁芳

候選縣丞楊德峻儘先副將陶茂林參將銜張養直率所部弁勇分三路出擊並派營總雙福率吉林八起委參領倭克吉布率突騎營馬隊均於步隊後列隊護營該逆見我軍馬步齊出遂卽過河漸逼營樞我軍先以鎗礮轟擊賊仍迎敵不退我軍奮力衝殺約三時之久賊見新安渡大股賊眾敗潰乃卽回竊協領卽調吉林八起暨突騎營馬隊乘勝追過河東始收隊回營計殺斃賊五六百名奪獲擡鎗小鎗刀矛旂幟各數十件此三月二十七日新安渡與挂車河兩處打仗獲勝之情形也查我軍馬步無一傷亡

卽欲乘勢進剿因連雨三日未果至四月初二日天色晴霽多隆阿卽令新安渡十三營拔營過洄瀾進攻天林莊賊壘派親兵年字忠字勝勇開化精選左等六營由新安渡中路出擊吉林六起馬隊繼之并調新中新左茂字左仁飛虎中左等六營由拉車河左路出擊吉林八起暨突騎營馬隊繼之派精選中前右義中新前新右飛虎右等七營由新安渡右路出擊黑龍江八起馬隊繼之自新安渡至天林莊中隔兩河部隊皆晁水而過分路徐進距賊壘二三里該逆望風膽落棄壘而逃多隆阿當令金順率各起馬

隊跟蹤追勦令步隊各營將賊壘悉數削平適大雨如注卽振旅回營金順等馬隊於初三日辰刻始至據稱追至孔城沿途殺賊約五百餘名此多隆阿連日力戰勦退援賊不得與陳逆合勢之情形也先是首逆陳玉成屯駐集賢關內外與城內之賊日夜夾攻曾國荃圍師經曾國藩暗調鮑超一軍合成大吉之軍由集賢關西北進勦適多隆阿將外援擊退遂由集賢關東北同日進勦逆首陳玉成知援賊外絕官軍四面合圍畱悍賊數千深溝高壘分踞關內外逆首於初十日自率馬步賊五六千人連夜由冷水

鋪向馬踏石奔竄多隆阿時已進逼磨山營次聞之
卽派溫德勒克西率富平阿之吉林二起常星阿之
黑龍江二起由黃馬河抄橫山鋪大路派金順率舒
亮之吉林六起巴彥杜楞之黑龍江八起暨雙福之
吉林八起由新安渡抄包家大橋并飛傳雷正綰楊
朝林穆正春王可升趙旣發曹克忠梁洪勝趙克彰
朱希廣姜玉順余福象王萬年藍斯明統帶十三營
弁兵均出全隊分途尾追白磨山至馬踏石相拒十
八里惟曹克忠王萬年二營由閒道先至楊朝林趙
旣發二營繼之賊至馬踏石河邊見追兵尙少卽督

齊隊伍意欲背水一戰該四營亦列隊牽制不使賊
奔少頃各營先後追及該逆前臨大敵後隔溪河
難越遁卽率眾拚死回撲各營奮呼直前鏖戰二時
之久該逆且戰且退紛紛鳧水過河我軍乘勝追抵
河岸因暮未便窮追遂卽收隊三更抵營計是役斃
賊約一千餘人生擒十一名奪獲旂幟刀矛甚夥我
軍並無傷亡溫德勒克西金順所帶馬隊至次日平
明追及包家大橋該逆踉蹌而奔馬隊追殺直抵蒲
家山賊壘賊眾蜂擁出隊接應逆黨入城始收隊回
營是日馬隊殺賊六百餘人亦無傷亡官兵此四月

初十一日馬步分途追賊獲勝之情形也十四日陳玉成復糾僞璋王林紹璋僞玕王洪成玕僞定南大主將黃文金僞格天義陳時永暨捻首孫葵心等髮捻共三萬餘眾馬賊四五百名復圖併力上犯由挂車河崿崿尖之巔斜迤棋盤嶺列隊二十餘里於江家橋閭家雙墩麻子嶺一帶築壘八座餘賊於壘後項家河一帶紮散營四十餘處是日陳玉成亦率悍黨數千人由山內破焚黃家鋪團卡旋據馬哨擒賊俱稱陳玉成攻破團卡後仍出山外調黃文金四千餘人隱伏山內陳玉成自率各逆首欲分三路圍

撲我營多隆阿乘其布置未定先發制人卽於十五日黎明派格通阿率舒亮之吉林六起巴彥杜楞之黑龍江八起先往伏於棋盤嶺伺賊出隊卽馳焚項家河一帶賊營並派溫德勒克西率富平阿之吉林二起常星阿之黑龍江二起伏於老梅樹街之左俟我軍進攻時卽由范岡出抄賊後平明多隆阿親率馬步各營分兵五隊揚旂而出以石清吉劉寶國藍斯明梁洪勝陶茂林張養吾之飛虎中飛虎左右義中茂字左仁等營爲第一隊由右路出老梅樹街以奈福象趙旣發曹克忠穆正春之親兵勝勇忠字精

選左等營爲第二隊由中路出以譚仁芳趙克彰楊德峻朱希廣王萬年之新中新前新左右年字等營爲第三隊由左路出挂車河以雷正紹楊朝林王可升之精選中前右等營爲第四隊徐出列隊於挂車山口以防山內之賊出襲我軍後路以姜玉順雙福富慶阿倭克吉佈率開化營吉林黑龍江西丹突騎營各起馬隊爲第五隊列於畎中以作中左兩路策應部署既定依次而進甫至河邊賊已分三路而來僞英王陳玉成與僞格天義陳逆率悍賊四五百人出挂車河之左僞玕王率黨七千餘人自雉雞塔江

家橋出挂車河之中僞璋王與孫葵心率賊捻一萬餘人由麻子嶺棋盤嶺出挂車河之右壘賊並未出隊賊之大隊均排於逆壘之前多隆阿卽飭第一隊之飛虎中飛虎左右義中茂字左仁等六營迎擊右路璋逆第二隊之親兵勝勇忠字精選左等四營迎擊中路珩逆第三隊之新中新前新左新右年字等五營迎擊左路陳逆其餘四五兩隊列隊不動我軍三路進逼三路賊眾亦搖旂吶喊來撲漸逼漸近我軍分途接仗往來衝擊至三十餘合該逆不稍退卻正酣戰閒賊之後軍忽亂溫德勒克西率所伏馬隊

飛騎衝入賊陣右路步隊各營士氣百倍馬步奮力
夾擊賊卽紛紛潰入中路我軍右路馬步卽斜抄中
路之後中路賊復不支並歸左路我軍中路各營卽
並歸左路與左路各營迎頭並擊右路馬步從旁夾
擊陳逆王成仍敢攔督中右敗賊施放洋鎗小鎗并
力死拒鏖戰二時之久忽項家河散營經舒亮巴彥
杜楞所伏兩起馬隊馳至焚燒煙燄突起賊遂慌亂
我軍勇氣倍加馬步一擁齊上鎗箭如雨連斃黃衣
騎馬賊目十餘名悍賊二百餘名賊卽紛紛潰散傍
山向桐城而逃多隆阿一面飭開化營及吉林八起

黑龍江西丹四起並突騎營馬隊進列河東牽制賊
壘并飛調精選中前右三營由挂車山口進剿黃山
鋪山內黃逆伏賊一面督飭馬步各營跟蹤追殺約
五里許適焚燒散營各馬隊橫抄而至該逆不敢戀
戰奪路狂奔我軍復合馬步并力進剿其江家橋麻
子嶺一帶壘賊仍踞未動多隆阿卽飭各營暨姜玉
順雙福富慶阿倭克吉佈等所率馬隊分撲賊壘以
期一鼓殲除親率數騎往來督隊各營將弁士卒奮
不顧身爭先併進拔毀木城四道証壘賊鎗礮尙多
洋鎗更夥子如雨下我軍前者傷亡後者繼進架肩

緣壘而入拋擲火蛋火箭霎時入壘之火均起賊棄壘欲遁我軍步隊從壘後殺出馬隊環壘圍斬入壘之賊斬殺無遺是時精選中前右三營亦抵黃家鋪與黃逆接仗逆亦敗竄該三營遂將山內賊館悉數焚然濃煙布滿山谷敗賊緣此而逃是役計踏焚賊壘八座山內山外賊館散營各數十處殺斃黃衣騎馬賊目十三名馬賊百餘名共斃賊八千餘名生擒二百餘名內僞丞相五名檢點三名將軍一名均經訊明分別斬釋奪獲騾馬四十七匹僞印百餘顆大礮六尊擡鎗一百餘桿小鎗三百餘桿刀矛旂幟不

計其數此四月十五日勦賊獲勝踏平賊壘焚燬賊館散營之實在情形也臣等查此次逆首僞英王陳玉成自鄂回竄由懷而桐復糾下游璋玠黃孫等眾並捻逆大股上犯希解皖圍我軍屢次移營迎擊追殺五獲大勝踏平賊壘八座前後焚破散營及賊館百餘處奪獲僞印自安福以下至指揮止二百餘顆其餘總制監軍通傳等僞印不計其數五次共殺賊不下二萬餘人實足以寒賊膽而伸天討頭品頂戴副都統多隆阿謀勇兼全忠勤尤著兵畧精審雖古名將無以過之可否仰邀優獎之處出自

天恩各營將士稟承號令戮力同心轉鬪追奔一月
有餘五次大捷所有迭次戰功卓著之 記名簡

放總兵四川梁萬營都司雷正綰請 賞加提督

銜儘先副將湖南永綏協螺螄壩守備趙旣發儘先
副將直隸杜勝營都司曹克忠儘先副將王可升副
將銜趙克彰均請 賞加總兵銜副將銜儘先參

將梁洪勝副將銜儘先參將湖南衡州協左哨千總
王萬年開千總缺均請免補參將以副將儘先卽補
並均請 賞給勇號參將銜儘先游擊藍斯明譚
仁芳均請免補游擊以參將儘先卽補並均請

賞加副將銜總兵銜儘先副將湖北提標中軍參將
石清吉總兵銜儘先副將楊朝林均請免補副將以
總兵

記名簡放副將銜不入班次參將余福象
請免補參將以副將儘先卽補並請

賞加總兵

銜副將銜儘先參將劉寶國請免補參將以副將儘
先卽補儘先副將陶茂林請

賞加總兵銜游擊

銜張養吾請以游擊儘先卽補並

賞加參將銜

藍翎選用縣丞楊德峻請免選本班以知縣不論雙
單月遇缺卽選加同知銜並請

賞換花翎呼蘭

廂藍旂佐領副都統銜卽補協領委營總莫德勒巴

圖魯常星阿呼蘭正紅旗佐領副都統銜儘先卽補
協領委營總穆圖善均請以副都統 記名簡放

吉林滿洲廂白旗佐領副都統銜儘先卽補協領委
營總舒亮請 賞給勇號呼倫貝爾廂紅旗佐領

儘先卽補協領伊普格圖巴圖魯格通阿請 賞

加副都統銜其餘在事出力人員可否擇尤保獎出

自 恩施其陣亡之五品花翎儘先千總楊得勝

吉林滿洲正藍旗托克通阿佐領下披甲藍翎委防

禦全安正白旗阿昌阿佐領下披甲藍翎德升吉林

拉林廂黃旗常海佐領下披甲藍翎卽補驍騎校四

十齊齊哈爾城廂黃旗蘇龍額佐領下披甲花翎卽
補驍騎校委防禦全星均請 旨交部從優議卹
以慰忠魂所有勦退援賊迭獲大捷情形會摺由驛
六百里馳 奏再現在道員劉嶽昭圍攻隨州臣李
續宜圍攻德安總兵鮑超成大吉圍攻集賢關外賊
壘尙未卽時破滅自黃州至宿松數百里未能分兵
兼顧而鮑超一軍本係皖南之師經會國藩撥援安
慶仍須暫畱北岸四月十一十二等日據江西探報
逆賊偽忠王李秀成一股又已竄踞義甯州武甯縣
逼近鄂省邊境臣官文已先後調派知府唐協和副

將余際昌何紹彩參將唐敏興游擊王允昌周開先
都司江得勝各軍步隊並委營總花凌阿馬隊分赴
興國崇陽通城通山一帶扼要防剿惟各邑道路紛
歧兵力尙單臣胡林翼應俟集賢關外賊壘蕩平雨
止放晴卽行籌撥營伍回剿黃州各屬賊匪並先調
撥總兵成大吉胡裕發統率十營勇丁分剿南北兩
岸竄賊合併陳明伏乞 皇上聖鑒訓示施行謹
奏

陳報自太湖督兵回剿啟程日期疏 五月十二
竊賊首陳玉成等上竄德安隨州分踞黃州蘄州黃

梅宿松等處復擁眾回援安慶逼我集賢關圍師之
後經副都統多隆阿督率馬步五次剿退援賊於前
總兵鮑超成大吉會師盡殲關外壘賊於後其關內
賊壘十三座又經候選道曾國荃作長濠圍之先後
會摺陳奏在案陳逆自疊經痛剿竄伏桐城之後
勢孤無援兇醜頓衰縱欲逞其狡謀復圖竄擾必非
近日所能爲力况多隆阿馬步全軍一萬餘人仍駐
桐城之挂車河屹然難犯鮑超一軍亦不下萬人現
經會國藩飭令進剿宿松仍可爲集賢關之聲援會
國藩又近駐東流與安慶相隔咫尺尤可隨時策應

是安慶勦辦事宜兵力已厚曾國荃得專意與水師
穩守圍攻無庸臣遠爲顧慮也惟鄂省之蘄黃各城

邑被賊久踞逆匪僞忠王李秀成一股由吉安瑞州
竄踞義甯州武甯縣逼近湖北之通山通城崇陽大
冶縣興國州邊界各州縣羽書告警日夜紛至安徽
撫臣李續宜圍攻德安又分駐黃岡新洲等處以固

武漢之門戶兵分力單兼顧爲難臣現駐太湖縣城

下游旣已解嚴卽當親督成大吉一軍回剿上游相

其緩急先援南岸再攻蘄黃全軍現已進發臣定期

於五月十二日起程臣自去冬患病數月纏綿近日

諸病漸輕惟吐血尙未能愈鄂省係臣之汛地武昌尤全局根本際此南北兩岸軍務迫急不敢不力疾從事以冀早事肅清其潛山太湖兩城均經派員畱兵固守一切守具軍火尙爲充實斷不致稍有疏虞所有督兵回剿并起程日期理合繕摺由驛六百里馳報

硃批覽奏各情俱悉欽此

再本年二月已革副將余際昌自霍山潰敗其哨官都司銜儘先守備徐步鰲籍隸羅田敗潰不復歸伍持刀至縣城團局索給口糧經羅田縣官紳傳諭徐

步鼇之父母禁阻徐步鼇仍露刃詈罵情尤悖逆當
卽提解軍營正法梟示又五月初十日據管帶信左
營副將曹日昇稟稱前哨官守備尹中鈺左哨官守
備潘中和什長把總嚴正興千總王得貴外委龔世
有等於五月初六日在城西門外歃血要盟開索口
糧稟請究辦查湖北東征兩岸水陸各軍欠餉均至
六月之久四百萬兩之多該守備尹中鈺等意圖開
餉歃血要盟若不從嚴究辦無以防微杜漸當卽按
軍法將尹中鈺潘中和嚴正興一併處決其王得貴
龔世有二名事發逃走均應咨部斥革行文原籍及

湖北江西各營一體查拏所有各弁犯事先後正法緣由理合恭摺附陳

馳陳安慶圍師戰守各情形疏 五月二十督發

竊逆首陳玉成回援安慶多隆阿之師五次大捷逆首竄逃先後恭摺 奏報在案嗣據統帶安慶圍師候選道曾國荃稟稱狗首陳玉成率馬步悍賊出楚北回援安慶三月十八日至集賢關內焚燒房屋火光燭天該逆騎馬親至後濠往來窺伺二十日黎明賊分三大股而來自毛嶺東至蕭家壩縱橫二十餘里旂幟林立該逆率黨列隊於菱湖之北岸城賊葉

芸來亦率黨出城列隊於菱湖之南岸以爲接應我軍環濠屹立不爲之動賊不敢逼惟連夜於菱湖北岸築壘十餘座城賊亦於南岸增壘五座城中出賊划置湖中以通往來二十二日會國荃商請水師提督楊載福調蔡國祥全營礮船由東岸擡入菱湖兼派曾貞幹之湘恆營與蕭孚泗之吉中節字營出濠護衛礮船狗酋遂分大隊捲旂疾趨由蕭家塢蜂擁而來蕭孚泗由中路堵禦鏖戰兩時多有斬獲忽賊馬數百騎由右路抄來將蕭孚泗圍在垓心趙其拔力戰死之曾貞幹急派張勝祿帶吉中義字營出濠

接應槍礮齊施蕭孚泗衝突出圍仍大呼回旂陷陣
殺賊百餘名賊眾潰退是時蔡國祥礮船二十餘號
已入菱湖轟擊岸賊奪獲賊船二十三日楊載福又
調唐學發舢板船十餘號入菱湖助戰轟賊最多惟
狗酋督率羣賊增修礮壘漸加逼近會國荃旋與楊
載福定計必須先據東路湖邊要地爲水師安泊之
所乃可制壘賊之縱橫二十六日派湘恆吉左吉中
義字智字和字節字等營及周萬倬之新後營出東
路橫濠倚水畔扼要修壘狗酋果欲以死力爭此要
地率大股悍賊連番猛撲槍子如雨我軍以一半接

戰一半修壘一晝夜而壘成二十七日周萬倬派都司劉祥勝率隊與水軍扼守新壘兩日之內水陸各營槍礮共傷斃賊約五百餘人內有賊目二名而我軍被賊槍礮陣亡數十名受傷亦百餘名然自是我軍水陸穩守嚴密無隙可乘適多隆阿軍連破璋玕黃等逆又鮑超成大吉兩軍均旦夕將至狗酋自知前阻圍師後受援軍走入絕地遂謀逃遁於四月初四五六等日陸續進屯關外初七日曾國荃與彭毓橘率步隊八十餘人並楊鎮南馬隊百人至關外審看地勢陰與援軍約會夾擊甫近賊壘狗酋卽以大

股分數路來撲馬步據險列隊以待該逆疑我師爲誘敵恐山後有伏遽止不前乃徐徐收隊適毛嶺之賊將近後濠曾國荃卽派本營數哨出濠迎擊槍隊排轟追逐其殺賊八十餘名奪獲擡槍刀矛旂幟九十餘件日將晚狗酋又督大隊繼進求戰我軍仍憑濠以待賊不敢犯旋據探報狗酋率黨於初十日晚由馬踏石鼻水而遁尙於關外赤岡嶺畱賊壘四座關內近濠畱賊壘十三座以爲死守待援之計曾國荃見關外賊壘已有鮑超成大吉兩軍圍攻惟十三壘之賊佔踞死守必非一時所能攻克惟作長濠圍

之以斷其去路則不攻而自困適因江水泛漲安慶西路所紮之營漸可抽撥十三日派副後長勝吉中信字等營共二千餘人分八壘駐紮又於東路吉左營抽撥二哨紮蕭家壩隄埂以礮船護之又調樅陽之吉中仁字營紮蕭家壩湖水邊各營通力合作開挖夾濠數日而成深溝高壘現在十三賊壘盡在長圍之中仍加意嚴防不敢疏忽據會國荃稟報前來臣等查此次逆首陳玉成以全力來援安慶該道所統圍城之師前後受敵乃會同水師從容布置悉合機宜使該逆終不得逞志將弁兵勇迭次苦戰拒退

悍賊亦皆著有勞績應懇

天恩準俟克復城池

彙案保獎惟陣亡各員并容俟查明另行開單請

旨交部

賜卹以慰忠魂除水師營出力打仗

業由提

臣

楊載福馳陳外所有曾國荃圍師穩守力

戰拒退援賊各情形謹會摺由驛六百里馳

奏

胡文忠公遺集卷四十一終

胡文忠公遺集卷四十二

長沙鄭敦謹

編輯

湘鄉曾國荃

水陸馬步各軍圍攻德安隨州迭勝疏

十一年

五月二十九日督發

竊皖逆陳玉成卽四眼狗圖解安慶城圍乘我師盡
駐皖境糾集髮逆捻黨逞志上犯竄踞德安隨州等
處經 官文等調派水陸各軍馳往攻剿迭將辦理
情形馳 奏在案嗣三月初旬我軍攻克孝感後
官文派道員劉嶽昭率所部勇丁四千六百人馳往

隨州攻勦兼保安襄門戶臣李續宜卽派道員金國琛會率各營同副都統舒保馬隊副將張啟基等水師進攻德郡乃該逆負隅固守於郡城外周列木城環浚深濠密布礮石以阻我師金國琛審察地勢商令總兵銜副將趙太和等率爲左等營紮城西以副將郭鵬程等率毅右等營紮城西南以副將周忠容等率新左等營紮城東南以總兵彭炳武等率剛右等營紮城東北金國琛與總兵蕭慶衍等率貞中等營分駐城之東南西三面均皆逼城而壘三月二十三四等日我軍於城外鳳皇山南壇山等處築成礮

臺晝夜轟攻該逆突由北門出撲經信中等營會合馬隊馳出截勦斃悍賊三四百名餘逆敗退入城四月初七夜舒保金國琛密令馬隊伏於東嶽觀之塲以貞左等步隊爲接應又令選鋒等步隊列於長濠之上防東北門之賊而令新仁等步隊伏北門以元左等營爲接應初八日黎明我軍以計誘之逆眾果揚旂出城金國琛等傳令各營掩旂息鼓俟其離城較遠號礮一聲伏兵盡起扼其西北門出入之路蕭慶衍與舒保突出衝擊張啟基等亦率戈船上轟逆眾倉皇失措棄械逃奔水陸馬步縱橫截殺計斃賊

六七百名生擒正法一百五十餘名敗賊竄伏城柵
爲我軍轟斃與逼死河內者不可數計十一日早大
霧迷漫賊眾由北門潛出圖撲我營經馬步先期戒
備分路截殺斃賊又三四百名自此該逆死守不敢
復出而我軍節次仰攻城上礮子如雨弁勇傷亡多
名金國琛等因令各營就壘中開挖地道功已過半
一俟逼近城根即可設計進取此剿辦德安城賊及
迭獲勝仗之情形也又隨州踞匪深溝高壘與德安
之賊爲犄角守之愈堅劉嶽昭自進軍擂鼓墩後節
次逼攻屢爲礮石所阻四月初三日偵知城賊於南

北兩路設伏而以西路排列賊陣往來誘敵爲包抄
我軍之計劉嶽昭察其詭謀遂令左營游擊孫均又
英營參將蕭品元等各率五成隊出左路迎擊北路
之賊而以右營參將李盛貴健營游擊朱湘霖等各
率五成隊出右路迎擊南路之賊又令老營都司劉
正庭副後營副將李復勝等各率五成隊輔以馬隊
迎擊中路之賊劉嶽昭自率親兵同游擊李用恆等
爲三路策應甫經整隊而行該逆卽率大股悉銳來
撲我軍奮勇直前鎗斃黃衣騎賊一名悍賊十餘人
逆黨猶抵死抗拒我軍三路圍剿大呼陷陣鎗斃刀

矛同時並進連斃賊二百餘名該逆紛紛潰散我兵追至河岸不及鳧渡之賊生擒溺斃者又數百名奪獲旂械數百件賊馬十餘匹因值天雨收隊嗣復迭次進攻該逆堅守不出五月初五日午刻城賊忽出數千人麤聚西門濠外添築土壘劉嶽昭親率各軍分路進擊直抵濠邊轟斃逆眾多名右營參將李盛貴首先登壘被賊鎗子穿左手仍負痛督戰將賊新壘毀平蕭品元等復率隊抄截殺斃黃衣騎賊四名又步賊二百餘名生擒九名餘賊奔竄入城現仍設法攻剿此剿辦隨州城賊連獲勝仗之情形也查該

逆等恃其城濠重迭負固死守以待外援我軍節節
圍攻期必盡殲而後快以免他竄又煩兵力現飭各
軍遏其奔逸絕其援應設法智取力攻迅圖克復堅
城仰紓宸厯其下游黃州蘄廣踞逆並南岸竄
匪亦經臣等分派水陸各軍次第勦辦以期尅日肅
清合併陳明所有攻克孝感首先登城陣亡之擬保
游擊銜都司劉光楚擬保守備許賓國擬保千總王
振裔王雲程成榮達蕭相輝擬保把總熊飛龍劉萬
軒儘先把總胡星輝楊雲從張楚南藍翎外委張青
山吳甘述王炳昆擬保外委李續堂王錦忠戴興高

及圍攻德郡迭次陣亡之擬保把總藍翎外委萬雲
祥毅右營擬保都司藍翎守備李堯瑞藍翎守備萬
魁勝藍翎把總楊占春藍翎外委李智信藍翎外委
劉文勝擬保藍翎外委周鳳二外委廖名擬外委張
楚勝元左營擬保千總李續文貞中營藍翎外委左
盈庭貞左營藍翎守備熊光和副前營擬保外委周
德太等三十名又圍攻隨州節次陣亡之擬保都司
藍翎守備謝益德擬保藍翎千總左啟發藍翎外委
莫有提擬保藍翎把總戴正一擬保都司銜藍翎守
備毛明作擬保守備銜藍翎千總會國富藍翎把總

戴紀山擬保藍翎外委陳勝之謝先二藍翎把總李
循源共十員名均請 旨交部各照原官及擬保
官階分別從優議卹以慰忠魂其餘陣亡受傷兵勇
另行分別辦理謹會同繕摺由驛五百里馳 奏
硃批知道了劉光楚等四十員名均照所請議卹欽此

恭報到省日期疏 六月初八日

竊 臣 以鄂省南北兩岸俱被賊擾親率成大吉等十
營回剿業經陳 奏在案五月十二日自太湖啟行
沿江西上六月初三日抵省先經督 臣 官文安徽撫
臣 李續宜會派副將何紹彩等進剿咸蒲崇通一路

之賊派副將成大吉候選道蔣凝學等進剿興治武昌一路之賊一俟南岸肅清再行合剿北岸所有微臣到省日期理合繕摺由驛五百里馳報

再臣自去冬患病今春加以咯血曾蒙 恩允賞

假一月在營調理自春至夏迄未全痊此次由水路回鄂感受暑熱欬逆愈甚嘔血日增精神大爲委頓合無仰懇 天恩再行賞假兩箇月在署調理所
有日行尋常事件卽飭藩司代印代行其軍務重件
臣仍與督臣官文安檄撫臣李續宜會商辦理謹附
片具 奏

諫胡林翼奏病未全痊再賞假調理等語湖北巡撫胡
林翼著再賞假兩箇月在署調理欽此 六月二十五奉

官軍克復通崇咸蒲等縣南岸一律肅清疏 六
月二十五日督發

竊逆首僞忠王李秀成竄踞江西瑞州府義甯州武
甯縣各郡邑後糾集大股分三路竄犯楚境擾及興
國崇陽通城大冶通山武昌咸甯蒲圻等州縣逼近
省城經 等調派水陸馬步各軍分途剿辦並武漢
籌防穩固情形恭摺 奏報在案五月初八日 臣李
續宜因武昌縣城與黃州府城隔江對峙恐賊踞修

礮壘阻我長江卽派道員蔣凝學率湘左亭左利左
三營兼程前進迅圖守禦旋據蔣凝學稟稱賊已於
初八日竄踞武昌該道卽於初十日會同水師游擊
曾紹霖都司陳東友督帶礮船水陸夾攻蔣凝學督
率隊伍直駐武昌近城之西山左右設伏城賊果分
三路來撲蔣凝學親自督隊鏖戰二時之久賊眾不
支伏兵齊起賊遂大敗復經水師沿岸轟擊計是役
殺斃騎馬賊目三名賊匪數百名淹斃受傷者尤眾
生擒二十五名訊明分別正法奪獲旂幟器械多件
賊受創後閉城不出經曾紹霖會同代理知縣龍雲

督飭水師用大礮晝夜向城環攻賊不能守遂於十六日四更奪路而逃當將縣城克復該逆大股仍盤踞興國之龍港等處擄掠民船希圖上犯先經官文派撥唐瑞廷丁長春帶領礮船駛入梁子湖迎擊廣東按察使彭玉麟派水師參將喻俊明管帶礮船由富池口駛入內湖直抵州境連日攻勦斃賊數百名焚燬賊船二百餘號奪獲刀矛器械數十件賊馬一匹旂幟二十餘面嗣臣胡林翼由太湖拔營於六月初三日始行回省先經臣官文臣李續宜會派總兵成大吉率貞右發中武前武中武後凱前凱後禮

左禮右桂字等十營道員蔣凝學率湘左新左利左
亨左四營知府毛有銘率湘右義從二營都司孟麟
率馬隊由省南之保安金牛一路進剿興國大冶等
處副將何紹彩知府唐協和參將唐敏興游擊唐啟
虞管帶新訓四營游擊王允昌率新昌營都司李克
儉率馬隊由省西之咸甯進剿蒲圻崇陽通城等處
並飭會合已革皖南道李元度上下夾擊分路前進
維時咸甯縣知縣金東昀督率鄉團約會水師嚮導
新前等營蒲圻縣知縣孫寶田會同釐局候補知府
但湘良督飭守卡礮船及各團勇均於六月初二日

將縣城收復適李元度所部各營自平江拔營將馬
港乾塘坳麥園何葛墩等處節節埽蕩敗賊遁入通
城於西門外孤嶺山築堅壘二座賊首僞黃天福伍
逆聚天豫陸逆勤天豫何逆均踞城中約四千餘人
將城加高安設滾木梅花椿爲久踞之計李元度於
六月初三日五鼓派游擊李正盛等五營進攻西門
一路又派守備王保清等帶柏字等營進攻東門一
路該道自率都司王連發等帶親前等營進攻南門
中路先將黃泥坳賊卡攻破鎗斃多名署通城縣知
縣傅詩督帶團紳會合兵勇直趨孤嶺山賊壘該逆

開礮抗拒我軍奮勇猛撲將火彈延燒賊棚煙礮迷
天逆眾慌亂退入西北門我軍跟蹤進城殺賊三百
餘名逆眾向崇陽奔逃卽於初三日克復通城縣城
餘賊或向南樓嶺越竄有由桂口司歸併崇陽者李
元度派各營進紮桂口自率岡字川字及親兵兩營
駐守通城初五日營務處陳奉彝李元嘉周綬等率
五營直逼崇陽南門外山岡約會崇陽縣知縣王筠
節勘明進兵路徑誘賊出戰該逆伏匿不出初六日
該營等與地方文武分三路進攻悍賊千餘人拒戰
其餘逃往寒泉大源一帶係往通山義甯之路各營

鼓勇進擊鎗斃百餘名該逆抵敵不住且戰且逃我軍追殺百餘名生擒七名奪旂三十一面又行李百餘挑救出難民百餘名卽於初六日克復崇陽縣城何紹彩等復由咸甯進剿搜殺餘匪此省西各城邑收復之實在情形也成大吉等率馬步各軍由武昌縣屬之保安金牛沿途剿洗踏平賊壘殺賊甚多所有分擾興國大冶通山之賊各州縣地境處處濱臨湖港經水師節節堵剿各該州縣文武率同團勇分守要隘賊已不能逞志嗣見金牛大股挫敗我軍分道齊至聞風逃遁竄往義甯各該州縣地方均於初

六七兩日一律埽蕩淨盡此省南一路各州縣同時收復之實在情形也現在李元度之軍已乘勢追出江西之義甯州并已移會江西交界各州縣實力堵剿由帶兵文武及地方官稟報前來查此次逆匪竄入楚境號稱十萬南岸州縣到處蔓延計圖窺伺省垣并勾連北岸之賊幸水陸各軍奮力攻擊旬日之內連克各城風聲所至賊眾膽寒現在南岸一律肅清堪以仰紓 宸厯查通城崇陽俱與江西義甯接壤當逆賊竄擾義甯時通城縣知縣傅詩卽帶團勇於義甯交界之苦竹嶺防守不料該逆已由南樓

嶺一路竄入縣城崇陽縣知縣王筠節正在義甯交界之小山界招集團勇力扼賊路而該逆已由通城突至以致倉猝失守城池該二員實無賊至逃避情事雖旬日之間旋即隨同官軍克復究屬未能先事預防應請革職署咸甯縣知縣金東昀署蒲圻縣知縣孫寶田均於大軍未到之前自行設法收復縣城尙知奮勉均請革職暫畱本任署武昌縣知縣龍雲到任僅止月餘雖經賊匪闖入縣城旋即隨同官軍收復代理興國州知州徐芝代理大冶縣知縣王墉署通山縣知縣王紹薪均履任未久雖縣境被賊肆

古方略通集卷五十一
擾仍督率紳團與水師扼要堵禦賊匪不能久踞以
上四員或向無城池或僅擾及境內或雖有城池而
旋失旋復均無賊至逃避情事然亦未敢以隨同克
復邀請免議應請於補缺後革職畱任所有在事尤
爲出力員弁兵勇容俟查明核實保獎恭候 恩
施除陣亡受傷各員另行辦理外所有官軍分路剿
辦連獲大勝克復通城崇陽等縣城池並剿退興國
大冶通山各地方現在南岸一律肅清各情形謹會
摺由驛六百里馳 奏

遴保才勝道府各員疏 七月二十二日

竊臣於咸豐十一年四月初三日準吏部咨開文選司案呈內閣抄出咸豐十一年三月初四日奉

上諭現在各省軍務未竣亟應簡拔人才講求吏治以期康濟小民俾無失所各該督撫於所屬各員平日立品居官知之有素著擇其廉潔自愛任事實心及素著循聲民情愛戴堪勝道府者臚列政績出具切實考語酌保數員候旨簡用其道員及州縣各官如有出色之員著一併核實保奏倘所保之人查有貪污劣蹟或名實不符朕惟該督撫是問其各力除積習秉公保薦毋得瞻徇情面任令屬員夤緣倖進

副朕知人安民至意欽此仰見我

皇上慎選真

才康乂小民之至意跪誦之下欽惕難名

臣維戡亂

之畧求才爲先事

君之義薦賢爲本謹就通省

所屬各員中逐加考察精心遴選查有鄖陽府知府
調署武昌府知府李宗燾器識遠大體用兼該道銜
漢陽府知府劉齊衡識見精密任事實心鹽運使銜
本任德安府知府李映棻才具宏通操守廉潔均堪
勝道員之任坐補江西永豐縣知縣張建基政有本
原愛民如子揀發知州署棗陽縣知縣王璐品行端
方官聲清卓同知銜江夏縣知縣夏錫麒守潔才優

結實可靠候補同知文希范立志誠篤任事穩練候補同知直隸州鍾謙鈞通達政體才識兼優均堪勝知府之任以上八員其平日立品居官皆臣所素知亦眾所共信相應請

旨將鄖陽府知府調署武昌府知府李宗燾道銜漢陽府知府劉齊銜鹽運使銜本任德安府知府李映葵俱交軍機處記名遇有湖北道員缺出請

旨簡放坐補江西永豐縣知縣張建基免其坐補江西永豐縣知縣記名以湖北知府用揀發知州署棗陽縣知縣王璐免補知州記名以湖北知府用同知銜江夏縣知縣夏錫麒開缺

記名以湖北知府用候補同知文希范免補同知記
名以湖北知府用候補同知直隸州鍾謙鈞免補同
知直隸州記名以湖北知府用理合具摺陳奏

克復德安郡城并分路追剿情形疏

七月二十

四日督發

竊^臣等前派副都統舒保即用道員金國琛水師副
將張啟基率水陸各軍圍攻德安府城前將連獲勝
仗情形先後奏報在案嗣陸軍添築礮臺水師沿
河排轟該逆仍恃其疊卡重濠堅忍死守我軍復率
各營弁勇分途開挖地道節次轟發地雷雖城身屢

次坍缺而逆眾立時搶堵我軍忘命登陴輒爲礮石所阻六月下旬金國琛等激勵士卒築隄蓄水環城浚濠以四面長圍困其城賊絕其賊援嗣長圍將成金國琛等遂於七月十一日早令蕭慶衍率毅右營趙太和率爲左營李續遠率強右營朱吉玉率爲右營王玉藻率溥左營王載駟率元中營葛清泰率瑞左營於東西南三路長濠上預爲埋伏又派德安知府阮福安陸知縣李泰源參將阿昌阿督帶練兵鄉團於西北兩路扼守又派楊富有率亨中營扼截北門彭星占率信中營扼截西門又派于高勝等率貞

左等營斜出西南邀擊而令彭炳武等率剛右等營爲左右翼包抄金國琛與陳得升等率選前副前等營出中腰衝擊是日午後布置甫定城賊由西北門出七八千人揚旂吶喊且前且卻者數次我軍號礮一聲蕭慶衍于高勝等率各營左右抄擊舒保督馬隊往來衝突水師張啟基沿岸排礮轟攻并分隊登陸接應賊眾披靡潰亂忽城賊又出五六千人圖抄我軍之後楊富有等俟賊隊盡出扼其西北門歸路大呼奮擊會合各路馬步縱橫截殺敗賊盡奔河西我軍趙太和等伏兵四起急架雲梯一鼓緣登連斬

守城悍賊多名立將郡城克復共斃城內城外老賊
三千四百餘名生擒正法者八百二十六名拔出難
民共男婦二千七百餘名奪獲馬匹旂幟鎗礮無算
此節次水陸圍攻七月十一日酉刻克復德安郡城
之情形也舒保金國琛等審察敗賊必分走隨州應
山各路當酌派隊伍令阿昌阿阮福等搜捕零賊卽
於是夜戌刻派彭炳武等馬步七營連夜馳赴應山
一帶追截金國琛率步軍十二營會同舒保馬隊連
夜向隨州一路跟追且戰且進十二日早追賊至平
林市遇敗賊屬集我軍列隊圍剿斃賊千餘是日二

更追賊至西河距隨州二十里又爲我軍截斃三千餘名十三日追賊至吳家店十四日追賊至萬家店皆應山所屬沿途斬馘極多屍橫遍野統計追勦賊共六千有奇內紅衣黃袍賊目數十名又生擒一百餘名餘賊逃匿應山信陽各鄉因馬步晝夜追勦均形疲乏遂收隊駐營隨州相機勦辦各等情據舒保等馳報前來查該逆盤踞德郡窺伺荆襄蓄謀甚毒先經臣等於荊州襄陽安陸等屬派撥水陸各軍節節嚴防嗣克復孝感後移師直搗德安而逆眾恃其城濠深固死守待援起獲逆眾名冊實有二萬二

千一百四十六人之多我軍破攻不下繼以地道又繼以長圍攻勦數月之久士卒傷亡實多今仰賴

聖主威福將士齊心用命得以克復堅城斬馘幾及萬眾實足以申天討而快人心鑲黃旂漢軍

副都統倭什洪額巴圖魯舒保忠勇善戰布政使銜廣東臬司彭玉麟于長江內湖布置師船調度有方應如何加恩之處伏候聖裁按察使銜卽

選道員金國琛擬請賞加布政使銜以道員

記名簡用記名總兵剛勇巴圖魯蕭慶衍擬請賞加提督銜記名總兵彭炳武擬請交部從

優議敘總兵銜儘先副將成得升總兵銜儘先副將
周忠容均擬請免補副將以總兵記名 簡放總

兵銜新授廣東南雄協副將張啟基擬請以總兵記
名 簡放儘先副將楊富有儘先副將劉長槐均

擬請 賞加總兵銜副將銜儘先參將朱吉玉擬
請免補參將以副將儘先推補並請 賞加勇號

記名總兵彭星占總兵銜儘先副將李續遠總兵銜
儘先副將趙太和總兵銜儘先副將王載駟以上四
員均擬請 賞給各該員祖父母父母正二品

封典儘先副將于高勝儘先副將郭鵬程儘先副

將王聯芳三員均擬請

賞給各該員祖父母父

母從二品

封典儘先選用游擊水師嚮導營都

司王吉請免補游擊以參將儘先推補湖北候補同

知吳廷華擬請以知府升用

自

天恩其餘

在事出力員弁兵勇再由

臣

等確查覈實另行籲懇

恩施除德安郡城善後事宜選委幹員馳往查

辦并先經咨明河南撫

臣

飭屬一體防剿一面咨行

舒保等會同劉嶽昭一軍將隨州踞逆迅速殄除仍

查明陣亡受傷弁勇另行辦理再舒保等連日拔隊

遠追是以

臣

等奏報稍稽合併陳明所有攻克德安

郡城及連日追剿敗賊情形謹會同幫辦軍務福州副都統多隆阿繕摺由驛六百里馳奏

再道員劉嶽昭一軍圍攻隨州六月二十五日黎明賊出東門將偷割馬草採取薪木經英左兩營伏勇直起擊之副後俊健三營亦同出狙擊斃賊數人擊傷十數人溺水者約二十餘人奪獲旂械等件餘賊仍退入城二十六日辰刻復率股自西南兩門張旂整隊而出時我軍右營伏於兩河嘴之閒奮起擊退先鋒營營官劉復勝獨先衝突立殺悍賊三人鼻梁受鎗傷猶奮勇追至賊卡斃賊二名適右腹中賊擡

子傷從旁突出爲親勇負回賊未入卡各營跟蹤追之雄俊兩營伏軍亦從西北抄擊生擒三人斃賊三十餘人奪獲旂械不少正擬乘勢奪門而城賊復出千餘隔壕奮施鎗礮礙難輕進遂收隊回營是役我軍陣亡二名帶傷十一名惟營官劉復勝傷重醫治需時是夜西門賊旂紛動劉嶽昭派各營四面設伏二十七日黎明賊眾麤集於西南各路我軍分道夾擊斃賊百餘生擒十四名奪馬二匹各色旂幟十三面鎗矛十二件正值痛勦時俊營營官擬保參將銜花翎游擊劉復勝被城賊礮擊負痛下馬親勇扶回

片時陣亡等情據劉嶽昭稟報前來除仍飭該道督率將士設法進攻迅圖克復外等查擬保參將之參將銜花翎游擊劉復勝隨同百戰屢著懋功今苦戰陣亡深堪憫惻合無仰懇天恩俯準飭部將

劉復勝照參將例從優議卹以慰忠魂出自鴻

施其餘陣亡受傷勇丁另行分別辦理并飭取陣亡劉復勝出身事蹟清冊送部外所有官軍接仗獲勝及營官陣亡情形謹合詞附奏

謹接此片於八月二十一日接奉

旨準

再圍攻德安迭次攻城打仗陣亡之藍翎都司歐陽
武藍翎守備胡炳元守備羅芳泰藍翎千總易昌明
王榮華周得勝擬保守備銜千總藍翎把總劉再久
秦瑞芝藍翎把總楊友勝把總彭光明劉正先藍翎
外委張玉和鍾瑞集外委駱光前黎久敬或首先登
陣或衝鋒陷陣躬冒矢石先後捐軀實堪憫惻相應
仰懇 天恩飭部各照原銜原官從優議卹以慰

忠魂此外陣亡受傷弁勇查明另行辦理合併附陳
上諭官文等奏請將陣亡各員弁議卹等語湖北官軍圍
攻德安迭次攻城打仗各員弁先後力戰捐軀殊堪憫

側都司歐陽武守備胡炳元羅芳泰千總易昌明王榮
華周德勝擬保守備銜千總藍翎把總劉再久秦瑞芝
把總楊友勝彭光明劉正光外委張玉和鍾瑞集駱光
前黎久敬均著交部各照原官原銜從優議卹以慰忠
魂欽此 八月二十一日奉

奏陳病勢增劇懇請開缺調理疏 七月二十七

竊臣

自太湖回省因病勢日重奏懇續假於六月十

七日內閣奉

上諭湖北巡撫胡林翼著再賞假

兩箇月在署調理欽此近日以來多方醫治原期及
早痊可庶竭駑鈍力遏賊氛以紓 聖主南顧之

憂無如欬逆彌甚嘔血日至升餘形銷神瘁氣息奄奄據醫云積勞內傷肝胃損敗久病之後攻補兩窮非專心靜養服葯刻難奏效督臣官文數視臣疾輒爲流涕卽同官來見無不悲臣之志而憂臣病之危也臣受

恩至深負罪至重雖肝腦塗地未堪自

贖何敢稍顧微軀惟臣神志昏瞶元氣大虧閱案牘

不過數行眼目卽爲昏黑行動須人扶持乃能起立

臣之一身本不足惜力疾從事已逾一年軍務地方

實多貽誤現在南岸一律肅清北岸之賊有安徽撫

臣李續宜督辦必能次第埽除再四思維惟有仰懇

天恩賞準開缺回籍俾得安心調理應俟到籍之日再行呈明地方官吏照例終制臣年甫五十未至篤老倘得靜心調攝病勢稍差一息尙存仍當捐軀圖報斷不敢稍耽安逸自外生成所有贅病勢增劇懇請開缺回籍緣由謹恭摺附驛馳陳

上諭胡林翼奏病勢增劇懇請開缺一摺湖北巡撫胡林翼著再賞假兩箇月在署安心調理毋庸開缺湖北巡撫著李續宜暫行署理欽此 八月二十六日奉

請卹陣亡之大冶縣知縣疏 八月十三日

竊查湖北大冶縣知縣倪應頤於咸豐十一年三月

十二日因剿匪墜馬受傷殞命當經臣等具題開缺並飭查明如何受傷殞命據實詳候核辦各在案茲據署武昌府知府李宗燾查明該員於本年二月初間因皖逆竄陷黃郡距縣僅隔一江該員會督弁紳在於黃石港籌辦江防於三月初五日夜突有匪徒竄入縣市滋擾該員聞報隨卽會同城守把總蔡紹陽典史李啟泰督率兵勇立時擊散旋因羽黨復聚於該縣東方山梅山寺地方該員於三月十二日會同興國營參將溫發魁把總蔡紹陽帶兵前往剿捕該匪放鎗拒敵以致該員中鎗墜馬因傷殞命當

經斬水縣帶勇之守備彭心友趨至會同溫發魁等
將匪逆奮力搜勦盡淨等情詳報前來臣等查大治
縣向無城垣該員倪應頤前於匪徒突入縣市滋擾
立即會同營典督率兵勇當時擊散尙知愧奮追聞
羽黨復聚星夜集勇請兵會同往捕並能奮不顧身
率勇力敵以致受傷墜馬殞命實屬臨陣捐軀情堪
憫惻合無仰懇 天恩俯準 敕部從優議卹

以慰忠魂而勵臣節謹會同督臣官文恭摺具 奏

再統領安慶全軍即用道曾國荃管帶湘恆等營國
子監學正銜候選訓導曾貞幹均係兩江督臣曾國

古不刊遺集卷之五
三
仰均候

聖裁又投誠賊目程學啟係安徽舒城縣人被脅充當偽職本年二月經湘恆營會貞幹招降收錄免罪立功程學啟投誠以來改過自新奮勇

圖報統領道員曾國荃立爲開字營數月之內屢次

血戰殺賊甚多實爲軍中有用之才可否

賞準

以游擊歸部儘先卽選並

出自 鴻施謹附片陳明

賞戴花翎以示鼓勵
再曾國藩兄弟忠義孝友萃於一門候選同知曾國華前於咸豐八年在三河殉難蒙

恩追贈道員

其兄曾國藩現任兩江總督率師東征備盡勤勞其

弟候選道會國荃率其季弟曾貞幹帶勇圍攻安慶
一年之久屢挫援賊卒能克復名城殲除逆黨無一
漏網厥功甚大臣等每聞其臨陣誓師忠憤激發而
念及國華殉難尤欷歔流涕不能自己軍士均爲之
感動現在會國荃曾貞幹已由臣等奏請加等保
獎可否仰懇 皇上特恩將前在三河殉難追贈
道員之會國華 隆施破格 給予謚法以爲
一門忠義者勸謹合詞附片具陳

再陳湖北危窘情形籲懇減成收捐疏 八月二

十二日

咸豐十年十二月二十五日

臣

會同湖廣督

臣

官文

具奏以楚軍欠餉甚鉅無可設措籲懇

天恩

俯準仍照前議以救飢軍以扶危局一摺奉

硃

批戶部速議具奏欽此十一年二月二十九日奉準

戶部咨復議稱

臣

等復查直隸廣西等省捐米凡報

捐實職照例統減三成

臣

等公同商酌應按

臣

部前

議收捐實職等項照例減二成遞減一成再行酌減

請援照直隸廣西等省減成章程準該省收捐實職

虛銜貢監統減三成其報捐升銜加級紀錄

封

典等項仍照例減四成再遞減一成核收以示限制

至原請收捐米一石作銀五兩前經

臣部查該省上

次奏定每石作銀三兩四錢之案酌加銀一兩每石

作銀四兩四錢較之原請數目僅核減銀六錢且現

在福建奏請收捐米石由海運通連耗米腳價每石

作銀四兩九錢經

臣部

酌核每石作銀四兩四錢今

楚省捐米就近支撥軍餉無須腳價每石以四兩四

錢核算已屬格外加增若如該撫所請則福建捐米

作價較少轉得有所藉口於捐輸京倉米石事務殊

多窒礙

臣

等未便議準應令仍照

臣部

前奏辦理又

捐輸折色一節亦經

臣部

奏令仍按銀數計算茲復

請每石捐銀二兩五錢是以銀折米復以米合銀未免輾轉繞算徒滋取巧應毋庸議奉 硃批依議

欽此此固部

臣

慎重名器之心亦顧全捐輸京倉米

石之意自應卽遵照部議辦理惟現在楚省危急之形與飢潰之勢日甚一日較之上年議辦減捐時岌岌實踰百倍有不得不爲 皇上懸陳者上年賊

踞皖桐間雖逼近楚疆而楚境尙無賊也今春賊由英山一路竄踞黃州德安江西之賊又於夏間竄擾興國大冶通山通城蒲圻崇陽一帶省垣萬分危急河南捻匪又復擾及襄陽光化一路勢不能不添兵

募勇以救然眉積欠征餉已數百萬兩而又加以添募之餉何由措辦上年尙有本省錢漕可征釐金雖絀亦尙未盡停歇今歲精華之地多遭蹂躪武漢黃德襄等府錢糧多滯釐金盡停僅贍荊州宜昌等府而四川賊亦踴張川貨川鹽俱阻隔不行以致荆宜釐課亦減減成收捐一事又以章程未定應者寥寥軍營征餉萬分支絀臣前在太湖行營守備徐步鼇持刀索餉尹中鉦潘中和嚴正興等歃血要盟開索口糧俱經臣由驛附奏先後正法在案履霜堅冰至此後愈欠愈多恐有非軍法所能禁遏者每念及

此寢食俱廢且兩年以來厯請部撥協款並無一處
解到者是則湖北此時無地生財無處求助萬分無
奈之計固惟恃此減成之捐輸耳夫捐輸一款雖照
原請減成章程辦理尙須苦心開導未能望其踴躍
輸將如照部議所減更恐裹足不前軍餉尙何所望
查原請章程凡捐實職虛銜貢監照例減四成升銜
加級各項減四成遞減二成部臣謂應援照直隸廣
西等省減成章程收捐實職虛銜貢監統減三成其
報捐升銜加級紀錄 封典等項仍照例減四成
再遞減一成核收以示限制臣於直隸廣西等省減

成章程未得其詳然如福建之以鐵錢捐安徽之以
餉票捐河南之以臺票鈔票捐臣前次奏稱其名
爲三成實不止此恐直隸廣西等省未必不同蓋亦
一時權宜之計也原請捐米一石作銀五兩部臣謂
收捐米一石準其作銀四兩四錢較之原請數目僅
核減銀六錢溯自上年奏請減成後復行奏明
試辦卽派員持照四處勸諭業已稍有成數今若議
加則已捐者未能辦冊未捐者因之裹囊且所加無
多實於湖北軍餉大有關係總之湖北之捐視其名
似於各省稍減核其實較於各省有加斷不敢過爲

苟且致妨大局至謂福建收捐海運米每石僅作銀四兩四錢今楚省捐米若作銀五兩則福建捐米作價數少轉恐有所藉口於捐輸京倉米石事務殊多窒礙此亦部臣之過慮耳夫福建自行福建章程湖北自行湖北章程因地制宜何能一律且福建係運京倉米石湖北係充大營軍食兩不相涉何憂窒礙是固宜變通辦理者也又原請章程凡捐輸折色者每米一石捐銀二兩五錢部臣謂是以銀折米復以米合銀未免輾轉繞算徒滋取巧應毋庸議不知以米合銀實於捐例無損而於捐款有益如部臣之議

不準收捐折色是必全收本色竊恐千里饋糧水陸
運費將至不貲其閒所損尤屬甚鉅總之部臣所議
實經常之道楚北所請乃權變之宜湖北但有一錢
生機足以稍資支放何敢爲是再三之瀆無如軍餉
積欠太多大營飢潰堪虞實有朝不保夕之勢時局
岌岌非敢故爲危詞且刻下京中經費浩繁現準部
文催餉甚急臣已將征餉暫停儘力先籌京餉然軍
士嗷嗷實深焦灼臣籌措無術負罪已深唯有籲懇
皇上逾格恩施俯念危疆 特降諭旨準照
原請章程凡捐實職虛銜貢監者照例減四成升銜

加級各項減四成遞減二成捐米一石作銀五兩交折色者每米一石捐銀二兩五錢庶得補收捐項接濟軍食以期拯救於萬一其專歸銅局各條並補交四成實銀者仍不準收以俗帑餉所有部議折成收捐章程實難遵照辦理緣由謹會同湖廣督臣官文具摺馳奏

胡文忠公遺集卷四十二終